

Evening Dogri (NSD) News

18-April .- 2026

खास खबरां

1. कैबिनेट नै प्रधानमंत्री ग्राम सड़क योजना दे त्रीए मरहले दा विस्तार करदे होई इसी 2028 तगर लागू रखने दी मंजूरी दिती। कर्मचारिएं लेई मंहगाई भत्ते ते पेंशनरें लेई मंहगाई राहत च 2 फीसद दी बढ़ोतरी गी मंजूरी दिती।
2. लोकसभा ते राज्यसभा दे अनमित्थे समें लेई स्थगित होने दे मगरा संसद दा बजट सत्र समाप्त होआ।
3. प्रधानमंत्री नरेन्द्र मोदी होर अज्ज रातीं साङ्गे 8 बजे देश गी सम्बोधित करंगन।
4. राश्ट्रीय महिला आयोग नै अमरावती यौन शोषण मामले दी जांच दी प्रगति दी समीक्षा कीती।
5. उपराश्ट्रपति वी.पी. राधाकृष्णन होर 19 थमां 20 अप्रैल तगर श्रीलंका दा दंडु रोजा दौरा करंगन।
6. अमरीका नै रुसी तेल खरीदने लेई बंदशें थमां छूट इक महीने लेई बढ़ाई ऐ।
7. आई.पी.एल. क्रिकेट च सनराईजर्ज हैदराबाद दा मुकाबला अज्ज संजा हैदराबाद च चेन्नई सुपर किंग्स कन्नै होग।

<><><><><><>

Cabinet Decisions

केन्द्रीय मंत्रीमंडल नै प्रधानमंत्री नरेन्द्र मोदी हुंदी अध्यक्षता च पूरे मुल्लै च ग्रामीण सिड़क राबते गी तगड़ा करने दे लक्ष्य गी ध्यानै च रक्खियै प्रधानमंत्री ग्राम सड़क योजना दे त्रीए मरहले गी मार्च 2025 थमां मार्च 2028 तगर लागू रखने गी मंजूरी देई दिती ऐ।

इक होर महत्वै आहले फैसले मंत्रीमंडल नै केन्द्री सरकार दे मुलाजमें लेई मंहगाई भत्ते दी बाददु किशत ते पेंशनरें लेई मंहगाई राहत देने गी बी मंजूरी देई दिती ऐ।

एह हुकम पैहली जनवरी 2026 थमां लागू होग। इसले मंहगाई भत्ते दी दर 58 प्रतिशत ऐ ते एहदे च 2 प्रतिशत दा बाढ़ा कीता गया ऐ।

केन्द्रीय कैबिनेट नै अज्ज भारत मैरिटार्इम इंशोरेंस पूल नाऽ दा इक घरेलू इंश्योरेंस पूल बनाने दी मंजूरी देई दिती ऐ- जेदे नै लगातार समुन्द्री बीमा कवरेज गी सखल्ला बनाने लेई 12 ज्हार 980 करोड़ रुपें दी सॉवरेन गारंटी ऐ। कैबिनेट मीटिंग दे बाद नमीं दिल्ली च मीडिया गी जानकारी दिंदे होई सूचना ते प्रसारण मंत्री अश्वनी वैष्णव होरें आखेआ जे एह पूल इसी

पक्का करदा ऐ जे भारतीय बपार गी कुसै बी विपरीत कार्गो लेई जाने आहले ज्हाजें लेई सस्ता बीमा मिलदा रवै। भले गै ओ अस्थिर समुन्द्री कारिडोर थमां गुजरा रदे होन।

<><><><><><>

Budget Session

संसद दे दौनें सदनें दी कार्यवाही अनमित्थे समें लेई स्थगित होने मगरा बजट इजलास जेड़ा 28 जनवरी गी शुरु होआ हा- समाप्त होई गेआ ऐ। लोकसभा च इजलास दे समापन भाषण च अध्यक्ष ओम बिरला होरें दस्सेआ जे बजट सत्र दौरान 93 प्रतिशत कम्मकाज होआ। इस गित्तै सदन दियां 41 बैठकां लगियां। श्री बिरला होरें आखेआ जे सत्र दौरान 12 सरकारी बिल पेश कीते गे जिंदे चा- खजाना बिल 2026- दोआलिया ते संशोधन असमर्थया संहिता संशोधन बिल- जन विश्वास प्रावधान संशोधन बिल ते केन्द्री सशस्त्र पोलीस बल- आम प्रशासन बिल 2026 समेत 9 बिल पास कीते गे। राज्यसभा च अपने समापन भाषण च अध्यक्ष सी.पी. राधाकृष्णन होरें आखेआ जे कुल मिलाइयै सदन नै कुल 157 घैंटे थमां मता कम्म कीता ते एह सेंशन तकरीबन 110 फीसद सार्थक रेया।

<><><><><><>

PM- Narendra Modi

प्रधानमंत्री नरेन्द्र मोदी अज्ज साङ्गे 8 बजे राश्ट्र गी सम्बोधित करगंन। महिला आरक्षण कन्नै जुड़े दे संविधान संशोधन विधेयक दे नेंई पास होने दे इक दिन मगरा प्रधानमंत्री होर एह सम्बोधन करा रदे न। विपक्षी दलें आसेआ समर्थन नेंई मिलने दे कारण महिला आरक्षण विधेयक दो तिहाई बहुमत पाने च असफल रेया इसकरि लोकसभा च इसी पारित नेंई करोआया जाई सकेआ। हद्दबंदी दे राएं महिलाएं लेई आरक्षण लागू करने कन्नै जुड़े दा प्रस्तावित कनून लम्मी बैहसू दे मगरा पास नेंई होई सकेआ।

<><><><><><>

NCW Meeting

महिलाएं लेई राश्ट्रीय आयोग दे अध्यक्ष विजया र्हाट-कर होरें महाराश्ट्र दे अमलावरी च परतवाड़ा केस दी प्रगति दा जायजा लैने लेई इक उच्च स्तरीय बैठक दी अध्यक्षता कीती। एह मामला युवा कुड़ियें दे अश्लील वीडियो ते फोटू लैने ते उनें गी जग जाहिर करने दे आरोप कन्नै जुड़े दा ऐ। महिला सरबन्धी राश्ट्र आयोग नै इक ब्यान च आखेआ जे इस मामले नै शोषण लेई टैक्रॉलोजी दे गलत इस्तेमाल- कंटेंट- सर्कुलेशन दे पैमाने ते पीड़ितें दी सुरक्षा ते सम्मान गी लेइयै- डुंगी चैंता पैदा कीती ऐ। कमीशन नै आखेआ जे उन्नै सरबन्धत अधिकारियें गी

फोरेंसिक आंकलन च तेजी आनने ते हर 5 दिनें च कमीशन गी प्रगति रिपोर्ट जमा कराने दा हुकम दिता ऐ। एहदे च अगै आखेआ गेआ ऐ जे SP ग्रामीण विशाल आनंद होरें दस्सेआ जे हून तक्कर मुख आरोपी सनें 8 आरोपियें गी गिरफ्तार कीता जाई चुकेआ ऐ।

<><><><><><>

V.P-Sri Lanka

उपराष्ट्रपति सी.पी. राधाकृष्णन कल थमां श्रीलंका दे दंऊ रोजा दौरे पर होगं। एह गुआंडी मुख दा उन्दा पैहला –पैहला दबक्खियां दौरा होग। ओह श्रीलंका दे राष्ट्रपति अनुरा कुमारा दिसा नायका हुंदे कन्नै मिलगं। श्री राधाकृष्णन होर श्रीलंका दे प्रधानमंत्री डाक्टर हरिनी अमर-सूर्या ते होर दुए मन्ने-परमन्ने दे लोकें कन्नै मलाटी करगं। उपराष्ट्रपति भारतीय मूल दे तमिल समुदाय दे लीडरें ते श्रीलंका दे उत्तरी ते पूर्वी क्षेत्रें दे तमिल नेताएं कन्नै गल्लबात करगं। ओह कोलम्बो च इक सामुदायिक कार्यक्रम च प्रवासी भारतीयें गी सम्बोधित करगं- जित्थे ओह तमिल समुदायें दे लाभार्थियें गी वर्चुअली घर सौपगं- जेड़ा भारतीय आवास परियोजना दे त्रीए चरण दे हिस्से दे रुपै च भारत सरकार दी मदाद कन्नै बनाए गे न।

<><><><><><>

VP Heritage Day

उपराष्ट्रपति सी.पी. राधाकृष्णन होरें अज्ज World Heritage Day दे मौके पर देसा गी शुभकामनां दितियां न। इक सोशल मीडिया पोस्ट च उ'नें आखेआ जे भारत दी सगोसार-सांस्कृतिक ते प्राकृतिक विरासत- देसा दी सभ्यता दी गहराई-विविधता ते सदा रौहने आहले मुल्ल-कदरे दा सबूत ऐ। उ'नें आखेआ जे पुराने स्मारकें ते पवित्र थाहरें थमां लेइयै जीवंत तगर देसा दी विरासत- पीढ़ियें थमां इंदे लोकें दी सांझी भावना गी दर्शादी ऐ।

<><><><><><>

WB -Elections

गर्मी ते गुम्मे दे बावजूद अज्ज पच्छिम बंगाल च विधानसभा चुनाऽ लेई सियासी प्रचार तेज होई गेआ। तृणमूल कांग्रेस प्रमुख ते पच्छिम बंगाल दियां मुखमंत्री ममता बैनर्जी पार्टी मेदवारें दे हक्कै च हावड़ा च इक जनसभा च शामिल होइयां। TMC लीडर अभिषेक बंदोपाध्याय होरें इक रोड-शो च शिरकत कीती ते उन्दे पूर्ब बर्धमान जिले च दूई जनसभा

बैठक च शामिल होने दी संभावना ऐ। भारतीय जनता पार्टी दे लीडर ते विपक्ष ते नेता सुवेंदु अधिकारी- पूर्वा मेदिनीपुर च इक जनसभा रैली च शामिल होए। बी.जे.पी. लीडर ते असम- उत्तर प्रदेश ते मध्य प्रदेश दे मुखमंत्री बी पच्छिम बंगाल दे बक्ख-बक्ख जिलें च जन बैठकें च शामिल होए। दूई बक्खी कांग्रेस लीडर ते तेलंगाना च मंत्री मोहम्मद अजहरुद्दीन- मुर्शिदाबाद जिले च रैली च शामिल होए। बाद च उन्दा मालदा जिले च रैली च शामिल होने दा कार्यक्रम हा। खब्बे धड़े ते दूइयें सियासी पार्टिं बी मोहल्लें च रैलिं ते लौहकी-लौहकी बैठक दे राएं प्रचार अभियान तेज करी दिता ऐ।

<><><><><><>

US Waiver

अमेरिका नै किश दिनें पैहले गै बंदशें गी नेंई हटाने थमां इंकार करदे होई मुलखै गी रुस थमां पेट्रोलियम उत्पाद खरीदने दी इजाजत देने लेई बंदशें थमां मिली छूट गी इक महीने लेई बदाई दिता ऐ। US Department of the Treasury दे कल जारी इक हुकम मताबक इस छूट कन्नै हून उनें गी रुसी शिपमेंट कन्नै जुड़े ट्रांजैक्शन दी इजाजत ऐ-जेड़े 17 अप्रैल थमां 16 मई तगगर जां ओहदे थमां पैहले समुन्द्र च हे। एहदे थमां पैहले अमरीका नै 5 मार्च थमां शुरु होने आले इक महीने लेई भारत गी रुसी तेल खरीदने पर बैन थमां छूट दिती ही।

<><><><><><>

Char Dham -Yatra

उत्तराखंड च चार धाम जात्तरा लेई ऑफलाइन पंजीकरण कल्लै थमां शुरू होई गेआ ऐ। पैहले दिन 2 ज्हार 713 श्रद्धालुएं व्यक्तिगत रूप कन्नै पंजीकरण कराया। कल्लै थमां शुरू होआ करदी जात्तरा शा पैहले गै पंजीकरण प्रक्रिया शुरू होई गेई ऐ। अधिकारिक आंकड़ें मूजब, ऑफलाइन पंजीकरण केंद्रें पर यमुनात्री लेई 683एं गंगोत्री लेई 690एं केदारनाथ लेई 667 ते बद्रीनाथ लेई 673 तीर्थयात्रियें पंजीकरण कराया ऐ। श्रद्धालुएं लेई मौके पर पंजीकरण दी सुविधा उपलब्ध कराने गितै बक्ख-बक्ख ट्रांजिट पॉइंटें पर बी टीमां जा करदिआं न। तोआई- जंदी 6 मार्च गी शुरू होई दी ऑनलाइन पंजीकरण प्रक्रिया अजे बी जारी ऐ- जेहदे च हुनै धोड़ी लगभग 18 लक्ख 23 ज्हार श्रद्धालुएं डिजिटल रूप कन्नै पंजीकरण कराया ऐ। अक्षय तृतीया दे मौके उपपर कल 19 अप्रैल थमां एह तीर्थयात्रा आधिकारिक रूप कन्नै शुरू होगा।

<><><><><><>

JK- CM Hajj

मुख्यमंत्री उमर अब्दुल्ला होरें अज्ज श्रीनगर दे शेख-उल-आलम अंतराष्ट्रीय हवाई अड्डे शा हज 2026 दे पैहले जत्थें गी विदा कीता। उ'नें हज यात्राएं गी सुरक्षत ते अध्यात्मिक सफर दी शुभकामनां दिती ते उनें'गी जम्मू-कश्मीर दी शांति – विकास ते खुशहाली लेई दुआ करने दी गुजारिश बी कीती। मुख्यमंत्री होरें मुत्तलका अधिकारियें गी यात्रा दे हर गेड़ गी हज यात्रियें लेई सुचारु बवस्था ते सुविधाजनक बनाने दे निर्देश जारी कीते।

<><><><><><>

Hajj Pilgrims Departure

इस बरे हज लेई 371एं हज यात्राएं दा पैहला जत्था अज्ज नमीं दिल्ली थमां सऊदी अरब दे मक्का लेई रवाना होआ। ज़ायरीन इंदिरा गांधी अंतराष्ट्रीय हवाई अड्डे थमां मक्का लेई रवाना होए। अल्पसंख्यक मामले दे मंत्रालय दे सचिव डाक्टर श्रीवत्स कृष्णा होरें पैहली डोआरी गी रवाना कीता। संवाददाताएं कन्नै गल्लबात च दिल्ली हज कमेटी दी अध्यक्ष कौसर जहां होरें तयारियें दी जानकारी दिंदे होई आखेआ जे प्रधानमंत्री नरेन्द्र मोदी हुंदे नेतृत्व च सब्बनें सुविधाएं च लगातार बाद्दा कीता जा'रदा ऐ।

<><><><><><>

IPL

आई.पी.एल च सनराईजर्ज हैदराबाद अज्ज संजा हैदराबाद दे राजीव गांधी अंतराष्ट्रीय स्टेडियम च चेन्नई सुपर किंग्स कन्नै मुकाबला खेड्ढोग। एह मैच संजा साड्डे 7 बजे नै शुरु होग।

<><><><><><>

House Demolished

केन्द्र शासत प्रदेश जम्मू-कश्मीर च नशीले पदार्थें दी तस्करी पर कीती गेदी इक बड्डी कारवाई च प्रशासन नै अज्ज शनिवारें जम्मू दे बेलीचराना इलाके च सुरक्षा दे सख्त प्रबंधें तैहत इक कथित नशा-तस्कर दे घरै गी ढाई दिता ऐ। साढे जिला संवाददाता नै रिपोर्ट दिती ऐ जे अधिकारिएं मुजब आरोपी इसलै जेलै च ऐ ते उन्नै एह जायदाद गैर कनूनी गतिविधिएं थमां हासल होए दे पैसे थमां बनाई दी ही। एह कार्यवाही इसलै चला'रदे नशामुक्त जम्मू-कश्मीर अभियान तैहत कीती गेई ऐ। अधिकारिएं दस्सेया जे पिच्छले बरे इससै चाल्ली दिएं

डेढ सौ इमारतें गी नशाना बनाया गया हा ते नशे आला नैटवर्क खत्म करने लेई इस चाल्ली
दियां सख्त कार्यवाइयां लगातार जारी रौहगंन।

<><><><><><>